



**Sud Bosne i Hercegovine**  
**Суд Босне и Херцеговине**

---

**Broj: S1 3 Iž 040497 21 Iž**  
**Sarajevo, 27.05.2021. godine**

Sud Bosne i Hercegovine u Sarajevu, u apelacionom vijeću sastavljenom od sudija Mirsade Džindo, predsjednika vijeća, dr Branka Moraita i Dinke Bešlagić Čovrk, članova vijeća, odlučujući o žalbi žalioca Ismir Juska, zastupanog po Zulkić Arminu, advokatu iz Sarajeva, izjavljenoj protiv odluke Centralne izborne komisije Bosne i Hercegovine, broj: 06-1-07-265/21 od 20.5.2021. godine, u pravnoj stvari prestanka mandata i dodjele mandata sljedećem kvalifikovanom kandidatu, u nejavnoj sjednici održanoj dana 27.05.2021. godine, donio je:

**R J E Š E N J E**

**Žalba se odbija**

**O b r a z l o ž e n j e**

Odlukom Centralne izborne komisije Bosne i Hercegovine, broj i datum navedeni u uvodu, žalioцу Jusko Ismiru, vječniku u Općinskom vijeću Centar Sarajevo, izabranom na Lokalnim izborima 2020. godine sa liste političkog subjekta SBB, utvrđen je prestanak mandata sa danom donošenja odluke. Stavom 2. iste odluke utvrđeno je da po pravosnažnosti ove odluke upražnjeni mandat iz stava (1) dispozitiva ove odluke dodijeliće se sljedećem kvalifikovanom kandidatu sa liste političkog subjekta SBB za Općinsko vijeće Centar Sarajevo.

Žalilac je blagovremeno uložio žalbu na navedenu odluku. Od bitnih činjenica u žalbi navodi da je odluka o prestanku mandata i dodjeli mandata sljedećem kvalifikovanom kandidatu sa liste SBB, nepravilna i nezakonita, jer ne obavlja nespojivu dužnost savjetnika savjetnika ministra za industriju u Federalnom ministarstvu energije, rudarstva i industrije i ne krši odredbu člana 1.8 stav (4) Izbornog zakona BiH.

Ispitujući pobijanu odluku u okviru žalbenih navoda Apelaciono upravno vijeće Suda Bosne i Hercegovine je zaključilo da žalba nije osnovana.

Žalba je neosnovana.

Kako proizilazi iz stanja u spisu predmeta donosilac ožalbene odluke, Centralna izborna komisija Bosne i Hercegovine je na pravilan i zakonit način, nakon što je nesporno utvrđeno činjenično stanje, u postupku koji je Centralna izborna komisija Bosne i Hercegovine provela po službenoj dužnosti, a u vezi sa postojanjem osnovane sumnje, zakonito provela postupak utvrđivanja postojanje nespojivosti funkcija u konkretnom slučaju. U postupku utvrđivanja relevantnih činjenica, Centralna izborna komisija Bosne i Hercegovine je po službenoj dužnosti uputila zahtjev i pribavila od Federalnom ministarstvu energije, rudarstva i industrije informaciju broj 08-30-1-833/21 od 21.4.2021. godine, u kojoj se navodi da je Jusko (Bego) Ismir, rođen 18.6.1971. godine, sa prebivalištem u Sarajevu, Općina Centar Sarajevo, imenovan na dužnost savjetnika ministra za industriju u Federalnom ministarstvu energije, rudarstva i industrije, te je u prilogu akta dostavljeno i Rješenje o imenovanju Jusko Ismira na radno mjesto savjetnika ministra za industriju u Federalnom ministarstvu energije, rudarstva i industrije broj 08-30-2-108/21 od 3.3.2021. godine. Pored toga, Centralna izborna komisija BiH je dana 18.5.2021. godine provela i poseban ispitni postupak u smislu odredbe člana 133. Zakona o upravnom postupku („Službeni list BiH“, br.: 29/02, 12/04, 88/07, 93/09, 41/13 i 53/16) radi utvrđivanja činjenica i okolnosti relevantnih za razjašnjenje stvari i davanja mogućnosti stranci da u potpunosti ostvari i zaštiti svoja prava i pravne interese u ovom predmetnom postupku. Na navedenoj usmenoj raspravi utvrđene su naprijed navedene činjenice o čemu je sačinjen i zapisnik koji je predocčen Jusko Ismiru, na koji imenovani nije imao primjedbe.

Na osnovu potpuno i pravilno utvrđenog činjeničnog stanja, koje žalitelj i ne osporava u žalbi, Centralna izborna komisija je pravilno primijenila i materijalno pravo na konkretni slučaj, jer je utvrdila da je članom 1.8. stav (4) Izbornog zakona Bosne i Hercegovine („Službeni glasnik BiH“, br.23/01, 7/02, 9/02, 20/02, 25/02, 4/04, 20/04, 25/05 52/05, 65/05, 77/05, 11/06 24/06, 32/07, 37/08, 32/10, 18/13, 7/14, 31/16 i 41/20) propisano da jedno lice može obavljati najviše jednu neposredno izabranu javnu dužnost ili najviše jednu neposredno i jednu posredno izabranu dužnost, osim ako ovim Zakonom nije drugačije regulisano. Nespojivo je istovremeno vršenje ovih funkcija sa vršenjem funkcija u izvršnim organima vlasti. Također je nespojivo istovremeno vršenje više od jedne funkcije u izvršnim organima vlasti.

Odredbom člana 1.8 stav (6) navedenog Izbornog zakona Bosne i Hercegovine propisano je koje funkcije se smatraju izvršnim funkcijama.

I po pravnom shvatanju ovog suda i dosadašnjoj praksi u primjeni zakona, funkcija savjetnika ministra je izvršna funkcija, pošto se stiče imenovanjem na vrijeme trajanja funkcije ministra, podliježe smjeni i radni odnos je na određeno vrijeme (dok traje funkcija) a ne primjenjuju se propisi o državnim službenicima.

Centralna izborna komisija Bosne i Hercegovine je jedini organ nadležan da odlučuje o prestanku mandata prije isteka vremena na koje je izabran član organa vlasti izabran.

Naime, članom 1.10 stav (1) tačka 6. Izbornog zakona Bosne i Hercegovine je propisano da izabranom članom organa vlasti na svim nivoima prestaje mandat prije isteka vremena na koje je izabran danom kada je izabran ili imenovan na funkciju čije

je vršenje nespojivo sa funkcijom izabranog člana određenog organa, kao što je predviđeno zakonom.

U konkretnom slučaju, Centralna izborna komisija Bosne i Hercegovine je koristeći ovlaštena propisana odredbom člana 2.9 stav (1) tačka 14. i člana 1.10 stav (1) tačka 6. A u vezi sa odredbama člana 1.8 stav (4) i (6) izbornog zakona Bosne i Hercegovine i donijela ožalbenu odluku.

Na osnovu svega naprijed navedeno, može se zaključiti da je Centralna izborna komisija BiH, na pravilan i potpun način utvrdila činjenično stanje i primijenila materijalno pravo i u skladu sa odredbama Izbornog zakona Bosne i Hercegovine donijela ožalbenu odluku.

S obzirom na navedeno, po ocjeni ovog vijeća, pobijana odluka Centralne izborne komisije Bosne i Hercegovine je pravilna i zakonita a žalba neosnovana pa je istu, primjenom odredbe člana 81. stav 1. Zakona o upravnim sporovima Bosne i Hercegovine („Službeni glasnik BiH“, broj: 19/02 do 74/10) valjalo odbiti.

**PREDSJEDNIK VIJEĆA  
S U D I J A**

**Mirsada Džindo**